

*LE CHAPITRE DV RANG,
contenant quatorze versets, escrit
à la Meque.*

AV nom de Dieu clement & misericordieux. Louez Dieu tout ce qui est au Ciel & en la terre, il est tout-Puissant & sage. O vous qui croyez, ne dittes pas que vous faites ce que vous ne faites pas, Dieu hay ceux qui disent qu'ils font ce qu'ils ne fôt pas, & ayme ceux qui combattent en rang & file pour sa loy, semblables à vne forte muraille. Souuiens toy que Moïse a dit à son peuple, Vous ne me ferez point de mal, vous cognoistrez à la fin que ie suis messager de Dieu, mais Dieu les a deuoyés du droit chemin. Lors qu'ils se sôt éloignez de l'obeissance de ses commandemens il ne conduit pas les impies; Souuiens toy que Iesus Fils de Marie a dit aux enfans d'Israël, ie suis messager de Dieu, il m'a enuoyé pour confirmer l'ancien Testament, & pour vous annoncer qu'il viendra vn Prophete apres moy qui aura nom Mahomet. Lors qu'il est venu avec des miracles, des raisons tres-intelligibles, & avec des argumens infailibles, ils ont dit qu'il estoit magicien; Qui est plus impie que celuy qui blaspheme contre Dieu? Les infidelles veulent esteindre la lumiere de la foy par leur bouche, mais

Dieu la fera paroistre cōtre leur volonté, il a enuoyé son Prophete pour conduire le peuple au chemin de salut, pour luy enseigner la verité de sa loy, & pour la faire paroistre plus que les autres loix du monde cōtre la volonté des infidelles. O vous qui croyez, Voulez vous que ie vous enseigne vne chose qui vous deliurera des peines de l'Enfer. Croyez en Dieu & en son Prophete, employez vos biens & vos personnes pour combattre pour sa loy, vous ferez tres bien si vous le sçauz cognoistre, Dieu vous pardonnera vos pechez, il vous fera entrer dans des iardins où coulent plusieurs fleuues, il vous fera entrer dans les beaux Palais d'Eden où est la supreme felicité; il vous donnera encor vne autre grace que vous souhaitez, sçauoir la victoire sur vos ennemis. O vous qui croyez, soustenés la loy de Dieu, Iesus fils de Marie a dit aux Apostres: Qui soustiendra la loy de Dieu avec moy; il sera soustenu & protégé de Dieu. Les Apostres ont respondu: Nous la soustiendrons; vne partie des enfans d'Israël a creu en Iesus, & l'autre a abiuré sa loy, nous auons donné secours à ceux qui ont crû contre leurs ennemis, & ont esté victorieux.